

# 1 PITA

## Pita ok mega namua

<sup>1</sup> Ne apan Pita Iesu Keriso watu enamot mega apanewa da. God om enumoni waene apane at pa muga ae vean iragi punanan wat amon piup Pontas, Galesia, Capadosia, Eisia amba Bitinia amonewa ame inap gaun waiangin.

<sup>2</sup> E watagaet ambagan Mamanua God enok bambin mega gapan ganganat imaeni ame, me viripewa tapen men taen. Ame, me Guewa woup am seni nagirewa entan imaen. Iesu Keriso boeni deniwa gan bigia ton kakae tayan. God kakae guragut garaet megawa ge baigan nonup mega aigap aigap eniwandan.

*Keriso boe sia yon wandeni men God wa atonasepen*

<sup>3</sup> Ap menan, God nugawa ame Ayop nuga Iesu mamewa wa atonasepen. Iwa God bagu sisi baware nunan anuni menan wan otua Iesu Keriso boe inakae yon wanden. Ame gapan nu inak ewakewa waraton, anu dao nuga bawarewa ap gapan taton anivin. <sup>4</sup> Amba yamanu uarenat God kakae guragut mega unaset dianeni ame unasepen. Ame aupa kimani kwayup nunan tainiwa, ame koe ta punun ya wa aeta.

<sup>5</sup> Iwa anu tumat ega kaimakaet taiana gapan God aroewa kwayup tae aiwandapina wam uiwa gapan inak ewakewa amat wandini tautanai.

<sup>6</sup> Nop ame menan endi aton anuiwanin, anse

wam koni otu da gapan nin kurut ugup ugup tautananewa, ame bagu sisi eneta. <sup>7</sup> E itan ame nataepen tapiwa, iwa e anu tumat ega kaimake den o kekera, ame ire yawapen taiwan. Ame agim gwayayame dena ame omaya tugune ire yawapen taine, ap umap. Agim gwayayame dena ame ire yawapen tuguine ame kakae, garewa mega aigap iragen go anu tumat ega om ame garawasen itan gapan ire yawapen taiwan go ya wa koeragameta. Amba Iesu sia entan tauepi wamewa gapan, yauya ao warep, wa atonat ge God oya oya mega tautanai.

<sup>8</sup> Ame Iesu Keriso e da da ya yawayan, go menan di anu guriwanin amba wam ma endiwa den da ya yaviwanin go e me di anu tumasiwanin. Ap menan e imuya potaya aton no dotouen, amba aton ap guegue mega da ya anu awa awa mini, iwa God oya oya mega potayap bararaen. <sup>9</sup> Ap menan anu tumat ega kaimakaet taianawa garewa ame guaya ega wat inakam imaiwan.

<sup>10</sup> Ame menan watagaet God no oise waiwanumune nagirewa God inak neginewa yawapen men baimakat wariwanum. Mu God garaet wat aipakam mega ame inayap tauapen menan yao nau wa onam wanumun. <sup>11</sup> Iwa Keriso Guewa, mu potamup wandeni menan Keriso ugu vegaek anu taneniwa amba me yaua wat bawarameni wamewa mu namu yawan waiwanumun. Ap menan God no oise waiwanumune nagire, God Guewa wadiam wandini ame yopewa ta tavewa yawapen taiwanumun. Amba anenen venat aiwandapinawa ame yao matagamepen den taiwanumun.

<sup>12</sup> Amba nop tavewa yop taiwanumune God to ewamoni ame muk munan uon ame e enan taiwanumun. Endi mu nop tave iragena ame oisewa wane e gaset anuyan. Ame God Nop Oit Mega Kakaewa wadidiaene nagirewa ame Guewa Woup Seni aroewa aupa kimani God watu enen use ago muneni gapan wadiaene. Ame den inak mame anea den yao awapen menan tainewa.

*Imunu woup am sep waninet*

<sup>13</sup> Ap menan imuya upan sean nene yamam tan ayamat taiwanian amba ek ingane wat tamanamiwanian. God Iesu Keriso watu enepi gapan yan kakae guragut garaet eneta ame ega di, menan anu dao ega ap mepe taiwanian.

<sup>14</sup> Endi menan e God ayamat mega tane me otu waiwa entan imaep inat waniet ega watagaet inak koewa gapan wainiana mini sia ya waniene. Iwa wam ame e asigiap, da ya anu kakayasean, ap menan, e inak koe koe, ek anuyana gapan taiwanian. <sup>15</sup> Ap menan imuya potaya woup am sep amba dim da tat anuyana gapan di taiwanian, iwa God ap tapen menan enan anu wani me imu pose woup am seni apanewa. <sup>16</sup> Amba God wani ok anega sean,

Ne God imuna potana woup am sen wanik angina ap mini,  
e imuya potaya woup am sep wanien.

<sup>17</sup> E mup God inap taiana e maman diwanin. Me orup da da tat muga nomanagaet di tapen men i keni tainiwa. Ap menan e piup ma gan wanienewa God viripe tan. <sup>18</sup> Go e asigiap di,

watagaet inat waniet ega i uoni inagewa gapan wainean iwa isimurae wai inamup wat nat tonat onin e inayap tauen. Ap menan Iesu koewa ega taiana garewa waren, ap wareni moni garewa taine mini uon iwa moni aro mega uon tata, go Iesu tani aroewa uon ya tata. <sup>19</sup> Ame Keriso, me man sip uruavewa tone irine mini korosi gapan tone deniwa nenenga kakae iragenawa gapan vetanen. <sup>20</sup> Keriso me watagaet amba namu God om enun wande en, amba piup kiman evi tan venasen. Go endi ma wam uiwa gapan e inak ega menan me aroga matagaen. <sup>21</sup> Endi Keriso gamup e God anu tumasiwanin iwa me wan Keriso bop gapan sia ao yon wanden, amba God me yaua ao waren, ap menan anu dao ge anu tumat ega God inap di wandia.

<sup>22</sup> Endi nop tavewa ma ayamase taiana gapan inak ega gaset bigi waren, ap menan endi tatae gwani Keriso dugup mega nagirewa munan anu guran gapan imuya potaya gare gare bumaga tantan anuiwanian. <sup>23</sup> Iwa, God nop mega inak yai-bobot nunini nopewa gapan ewake sia yanayan menan inak ewake ma uon ya tata go usenagaet wande aiwandata. <sup>24-25</sup> Mame menan wataget God wani ok anega sean,

Waenapan iragi unawat umap,

amba mu ganat muga pu raremai kakaewa mega umap.

Unawat wae ineta amba rarema tua orot wata.

Go ayop nuga God nop mega usenagaet wande aiwandata.

Ok ap anega sean. Mame Iesu nop oit mega kakaewa enan wa onam wanumune ame wadi-  
aivin.

## 2

### *Iesu me gwat bonawan*

<sup>1</sup> Ap menan inak ega koe koewa aopan ya wa umane, da wa da ta ya tane, anu koeam ya ta wane amba nop koe koe ani aninke den ya waiwanian, ame iragi ise di wat mutan. <sup>2</sup> Orup otu ewake yanane am atnasine mini wanien God nop mega kakae guragut wadidiaene am mini at nat wanien. Ap nane gapan kai waran inak tautanai. <sup>3</sup> Iwa God nop mega ok anega seane, Ayop dansewa mega enan anuini ame gaset na anuyan.

<sup>4</sup> Ap menan, endi Ayop Iesu inap onaen, me gwat yaibobot wandini umap, ame piup ma waene apane tandayasene go me God bumagape mega iragena om enuni di tauen. <sup>5</sup> Endi e ap umap sia agim bonawan wande iramini umap wanisi. Ap gapan waniene God Guewa pa mega gamuyap tup. Pa mega ame gapan e ian pirisi imu pose woup am seni nagirewa yan garaet guaya gapan God inap, Iesu Keriso gamup wanan. Watagaet di Diu nagire God men man gure iri-wanumun go endi Iesu Keriso nunan tani gapan imuya God inap wanane God anupi umap wata. <sup>6</sup> Ame God Iesu menan nop wani ok anega seane,

Ne agim kakae iragen da ganganasena waran,  
at Ierusalem gapan inak ibariwa baran,

amba waenapan da da pa muga ibariwa agim  
kakaé iragena,  
ame aigap tupiwa, mu umam bagu sisi da ya  
anuin.

<sup>7</sup> Ap menan, e Iesu anu tumasiana nagirewa e  
yamayap agim ame kakaé iragen. Go ya anu  
tumasine nagire mu pa agim gan tuine nagirewa  
mini, munan God ok anega seane,

Pa agim gan tuine nagire agim ame koerage dian  
aipa uarenane,

go ne sia waran, kakaé iragenawa dian,  
amba pa nega aigap sia tuivin.

<sup>8</sup> Den agim ame menan ok anega sia seane,

Agim mame waenapan sintanamop onan  
geamoin.

Ap sintanamuini iwa God nop mega ya anune  
warine men onana geamuiwanumun, go ame  
menan God om enumon.

<sup>9</sup> Go e gaset God mega om enueni di wainisi  
amba pirisi mega ge waenapan imu pose woup  
seni megawa amba God ganganat imaeni na-  
girewa ame e me di wainisi. Ame sisip gapan  
wainean wa upaen dun ganat mega kakaewa  
gapan tauayan. Menan God kakaé guragut mega  
tani no oisewa wadidiam wanin. <sup>10</sup> Watagaet e  
God waenapan mega ya wanien, go endi e God  
waenapan mega di wainisi. Amba wam ame  
gapan, God enan bagu sisi anuini e ya di asik  
tayan. Go endi e asigip tayan ame bagu sisi enan  
anu gurini apanewa.

*God menan anu in aninampen*

<sup>11</sup> Kaiwan evenan wainawa, e piup ma gapan ian ugupe mini wainisi. Ap menan ne dari-nai enuen taiangin iwa inak koe koe ek anuian tayana gapan guaya etuya den toga uaren taiwanum. Ap taiana mek ae di vean. <sup>12</sup> Ap menan e God tandayasine nagire nimakamup waniene yambuni wanien koerage da tat dia enu yawai wapi, guegue ega kakaewa taiana yao anupi gapan mu den God yao anuin. Amba Iesu sia taupepi wamewa mu oya oyae den God yaua ao warain.

*Piup ayopewa viripamu den tapen*

<sup>13</sup> Ayop nuga Iesu aigaven aisiwanian menan piup ma ayope aigapewa nop muga e den anu wariwanian. <sup>14</sup> Amba gauarape mega nomu den anu wariwanian, iwa God watu enamuin amone waenapan inak koe koe taine wa okonak mumane wae wae nemoro tamuineawa amba kakaewa taine nagire atonamu wainewa. <sup>15</sup> Iwa God anut mega anuini ame e inak kakaewa taiana nagirewa menan guegue ega gapan nop ya anu kakayasine ame wawa koko inayap taine nagire wat tamanam mumai. <sup>16</sup> Ap menan e kakae tat anuiana di taiwanin, go inat waniet ega ap gapan aopan aopan tan inak koewa arok ya wanane. Go inat waniet ega kakaewa gapan God nao mega nagire mini ta aisiwanian. <sup>17</sup> Menan waenapan iragi viripamu tan, tatai gwani God dugup mega daitona nagirewa munan ae anu guran, God men iai oni paitan sean amba piup ayopewa viripamu den tan.

*Keriso tani guegue nu den anu tapen*

<sup>18</sup> Amba ayamat kaimakaet taiana nagirewa e aritawa ega viripamu taiwanian, ame inak kakaewa taine ge imuya warini nagirewa munan mugenat uon, go tandae den yawaene waine nagirewa inamup den wat nat taiwanian. <sup>19</sup> Ap menan e nop i uoni gapan vek ugu vegaek anu tanai, go God men anu vek ugu vegaek ame kae doak dianewa God wat aipakam imaeta. <sup>20</sup> Ap gapan e inak koewa taiana menan guraepi vek anu sisime taiwaniampinawa ame ge garewa gega di go e inak kakaewa da tane menan gaut araep vek anu sisimenewa ame God wat aipakam imaeta. <sup>21</sup> Endi e map anega vek anu sisime taiwaniampen men God enan wan, iwa Keriso enan vek anu sisimeni ame e me umap ta ewap aisepen men guegue ta ewaen, ap menan pusi uap amu amu aisen.

<sup>22</sup> Iwa Keriso me inak koewa da ya tan amba me noa gapan nop koewa eboewa da ya wan. <sup>23</sup> Amba waenapan Keriso enu yawagen tan waiwanumun go me gare da ya enu yawamo wan. Keriso epi vege anu sisime taiwandin go me gare om am da ya tan. Go me God wanene tamana taini apane tumap wande en. <sup>24</sup> Ap menan Keriso me ugu wapi uruga ware inak nuga koewa menan awan ine korosi doren, menan nu inak koewa taitoni togurat boep. Inak kakaewa gapanamet use wanin aninampen iwa Keriso etu no to sisitnak gene gapan nu inak waraton. <sup>25</sup> Amba watagaet e man sip kwayupe uoni umap punanan wat aisean go endi e sia entane sip kwayupe taini apanewa inap tauayan. Iwa me guaya kwayupe tainiwa.



### 3

#### *Waene meme dena noa*

<sup>1</sup> Endi gat namu wana umap sia, ian waene meme wai den wa enat taiwanian. Ap gapan meme wai upi God nop mega ya anu tumasepiwa ame waene wai inak kakaewa ta ewamone yawaepi gapan mu imumu entanep, God nop mega anu warain. <sup>2</sup> Iwa e imuya potaya ganase wani amba e God menan iai oni paitan siwani-ampina gapan iraya yawaepi gan mu Iesu anu tumatain. <sup>3</sup> Etuya bene warayan iae gume benasean, kwasip kurantan, na tau sinayan amba gan gorogot kakaevet taianawa gapan memae wai inak kakaewa ta ewamot ya anune. <sup>4</sup> Gare e ben ayap ega ta ewamopen tanewa ame imuya potaya gapan tan, ben ame tanewa wanatai koe ya tata go ame ae meare guaya benewa tunano wande aiwandata. Ap tanewa ame God yamap kakae iragen.

<sup>5</sup> Amba waen watagetawa, God wa taragasi-wanumune nagirewa ame ben muga ap anega. Mu anu dao muga God inapaet tan gapan meme wai den wa enat taiwanumun. <sup>6</sup> Waen ap umape, waen Sera tan. Me memewa Eibaraam nop mega ware amba den ayop mega dien. Endi e ap umap ta aisiwaniampinawa amba dim da tawa ya anunewa, ap gapan e Sera ore waiwa di.

<sup>7</sup> Endi meme waiwa e ap umap sia waenae wai tanam wainepen tanewa, ae anu kakayasen gapan iniwanian, ame mu e epara ega gauarap wanumam. Amba viripamu den taiwanian iwa mu den God garaet wat aipakam mega ame inak egawa, gine daiton gapan wat aipakam imaen.

Map anega di taiwaniampinawa gapan mup ega  
God inap waiana ame dim da da ya toboreta.

*Inak kakaewa vege atoewa*

<sup>8</sup> Nop gat wana semu mam, ame imuya potaya  
daiton tap gare gare anu guran amba denip  
daitonawa entan imaep gapan bigat itan wanien.

<sup>9</sup> Ap gapan inak koewa da ta koeragam imaepi  
men garewa sia ya tane amba sintapun waraepi  
garewa den ya tane, go garewa tapen men aton  
munan, wat aipakam muman. Iwa God wa  
agiat imaeni tavewa ame wat aipakam mega yon  
borapen menan diaen. <sup>10</sup> Ap menan watagaet  
God wani ok anega seane,

Orup da aton gan wandet anupiwa,  
amba inak kakaewa piup gapan wanumot  
anupiwa,  
me meriwa gapan nop koewa ge eboewa da ya  
waiwandan.

<sup>11</sup> Amba inak koe koewa taiana ame ae vean,  
wat entan ta inak kakaewa taiwanian.  
Ap gapan baigan nonup neginewa gapan wani  
aisiwanian.

<sup>12</sup> Ap menan, Ayop God yamewa uarenen,  
inak kakaewa taine nagire inamup wandia,  
amba darine pemagen mup muga waine anui-  
wan.  
Go koewa taine nagire inamup gariwa bat muni-  
wan.  
Ok ap anega sen.

*Iesu menan waenapan ta koeragam nimanain*

<sup>13</sup> Inak kakaewa da tapen men kaimakaet anu  
gura taiwaniampinawa waenapan da ya enu gu-  
rai wain. <sup>14</sup> Gosi inak kakaewa da tane men

enu gurai wapiwa e aton anun amba tap ge gop ya anune, iwa ap gapan God wat aipakam mega warai. <sup>15</sup> Go iai oni paitan sean imuya potaya gapan Keriso nu Ayop nuga waran amba wa taragasiwanian.

Ame gapan orup da taue anu dao ega Iesu inap taiana me singui wayawaepi e wa tamanam wanapen men agun anun amba wanien. <sup>16</sup> Ap garewa wapen tanewa iai namu woup sep nengga iragen gapan amba nop bigigai gapan ase wan, amba e inak ega kakaewa Keriso inap taiana menan nop koe koe inayap waine nagirewa anupi umam waramota. <sup>17</sup> Ap menan God anuini ame inak kakaewa taitoni men wat yapat tainanta ame kakae aigap di go koewa taitoni menan wat yapat tainanta ame kakae uon. Ame God imua mega gapan di taivin.

<sup>18</sup> Iwa Keriso waenapan iragi koewa nuga menan wam daiton megenat di boen, me koewa da ya tan go koewa taine nagire tambumo God ine aepen men boen. Waenapan etua gapan tone boen go God Guewa gapan sia wat inakamen.

<sup>19</sup> Wam ap gapan Iesu tau ae borit wane nagire guamu gwat noke gapan wanumone ame opata gan wadidiam wandin. <sup>20</sup> Waenapan guamu mame watagaet apan Noa kabum kaisiwandini wamewa gapan God tandayasene nagirewa, mu God nop mega ya anuiwanumune men God yaentuk yao gwen gwenat mumiwandin. Amba tawak watu eneni ame waenapan nani yamu-naet yamu yampo nagire kabum gwane dotouan kaum gawanip mugenat inak warane. <sup>21</sup> Apan Noa ap tani guegue mega endi mame Iesu menan

dup ivin, ap taitoni gapan nu inak warivin. Ame mondi etunu bigi warapen men dup ya ivin go imunu nenengawa gapan Iesu Keriso bop ta sia yon wandeni ap gamup inak warapen men dup ivin. <sup>22</sup> Endi menan Iesu gaset kiman dot aen, God mainewa nutup gapan wandia amba anea ge kiman aro amun mega ugup ugup warane wanu-muine nagirewa ame iragi me gauarap wanum amun.

## 4

### *Inak koewa gapan entan tan*

<sup>1</sup> Keriso piup gapan wandeni wamewa, me vek ugu vegaek anu tanen, ap menan e me tani gueguewa mini anu taiwanian, iwa orup da me etua gapan vek anu sisimiwandapinawa me inak koewa da sia ya enanase taiwandata. <sup>2</sup> Ap menan e mini kaimakaet tan. Piup gapan wanienewa inak ega etuya gapan ya tane go God anuini gapan taiwanian. <sup>3</sup> E watagaet Iesu ya anu tumasine nagire umamup wanie aton taiwanian, ame gapan inak koewa wainan gogo taiwanian, kaum kaimake dena naiwanian, anut koewa anuiwanian ge sinoa tarep i uoni taiwanian amba oma nanimup kaisine ame wa taragasiwanian. <sup>4</sup> Amba endi e Iesu ya anu tumasine nagire sia ya enanat mumiwanian. E inak koewa den ya taiana menan ugu gangane tane diguguraiwanum. <sup>5</sup> Go mu iman koewa muga mame oisewa God ase aroga wadiain, iwa me waenapan kabaniwa ge borit wane nagirewa wanene tamopen amase wandia. <sup>6</sup> Iwa ap menan Iesu bop tani namu ae borit wane nagire inamup taue God Nop Oit Mega

Kakaewa opata gapan wadidiamon. Ame gapan God waenapan kabaniwa ge bonigawa wanene gine daiton tamota. Ap ewap mu guamu God den wanumoin.

*God yan aiman mega yambuni danamepen*

<sup>7</sup> Endi wan dim dim uon an tapi wamewa di mananiwan, ap menan anu kakayasen nene yamam tane gapan God inap mup den waiwanian.

<sup>8</sup> Amba guegue aigap iragenawa ame evena wai munan gare gare bumaga tantan anu guriwanian iwa baigan tan gare gare anu guriwaniampinawa inak ega koewa iragi dawap ise museta.

<sup>9</sup> Amba daio nagire taupepi waupamo pa ega gapan semon, gau gundumane den garip ya wa taiwanian.

<sup>10</sup> Menan endi e daiton daiton yan aiman ega God eneni ame waenapan ago munapen men danamiwanian. God nao mega kakaewa taiana nagire yan garaet eneni ame gapan gapan waran di danamiwanian. <sup>11</sup> Ap menan orup da opata waiwandat wa waneni ame God menan di waiwandan, amba waenapan wat agoat mumat otua ame God menan di taiwandan. Ap tainanta gapan wa atonat nuga iragi God inapaet, Iesu yaua gamup di tainampen. Iwa oya oyae amba aro amun iragi me inap usenagaet wande ainiwa. Ame umap.

*Iesu anu tumasitoni menan waenapan ta koeragam nimanain*

<sup>12</sup> Evenan wainawa, itan bagu sisi doak ame taue pusiap upe iraya yawapen tapi ame anu bambam tan anega ya anune, “Inak oarewa da

ma amba inanap tauia.” <sup>13</sup> Go e gare daramuya wap, ame Keriso vek ugu vegaek anu wat yapeni ame upinewa di wariwanin, ap menan Keriso oya oyae den sia tauepi wamewa gapan, e imuya aton bararaeta.

<sup>14</sup> Ap gapan waenapan e Keriso ewap aiseana nagirewa menan wawa koko inayap ta wapi e aton anun. Iwa God Guewa oya oya den amba wat aipakam mega inayap wandia. <sup>15</sup> Go waenapan da guram boniga semonewa, o up tanewa ge waenapan da koewa muga menan den noek wanewa, ap gapan itan bagu sisi wat yapanewa ame koerage. <sup>16</sup> Go e Iesu dugup mega intum tayan anu tumasiana menan itan wat yapane ame gapan umama ya anune, gare God wa atonasen iwa e Keriso yaua tanop tuiana menan.

<sup>17</sup> God dugup mega nagirewa wanene tata wamewa konintu taiwan. Wanene mega namu nu inanup taueta. Menan God No Oise Kakaewa tandayasine nagirewa inamup wanene ame aigap sia intanigaet warain iwa mu anu tumat den uon. <sup>18</sup> Ap umap sia God nop mega watagaet ok anega seane,

Orup da inak kakaewa taini,  
ame inak tana tana kaimake den menan,  
orup da God tandayase inak koe koe taniwa ame,  
me anenen inak wareta?  
Ok ap anega sean.

<sup>19</sup> Ap menan e God menan itan wat yapa ta aisiwaniampinawa ame inak ega kakaewa aigap sia di ta aisiwanian. Ame anu dao ega God inapuet wandep iwa me tan venat nitatoni apanewa

amba me agi wani gapan gapan kakaevet di taiwandata.

## 5

### *Dugup airasewa nagirewa*

<sup>1</sup> Endi dugup airasewa nagire nimakayap wanumuine inamup nop kaimakaet wain. Amba ne mini dugup airasewa da. Ne Keriso vek ugu vegaek doak ame wat yape taiwandini ne den yawan. Amba ne iman God oya oya mega ame venasepiwa upi ne warain.

<sup>2</sup> Ap menan God waenapan mega kwayup e tamopen diaivin, amba kwayup tamone mu e gauarayap wanumop. Ame waenapan dadak enane gapan ya taiwanian go aton den tat anuiana taiwanian ame God anut mega gapan di. Amba ap me taiana moni menan ya taiwanin ame imuya ago tamot anuyan men di taiwanin. <sup>3</sup> Waenapan naniap bagup di wanumuine nagirewa apan apan ta yam ta ya yawamo wane, go guegue ega kakaewa ta ewamopen.

<sup>4</sup> Amba waenapan kwayup tamuini aritawa nuga Keriso tauepi, e iman kiman kakaie guragut mega payuewa warai, payu ame ganasewa ya auraeta.

<sup>5</sup> Gat namu wana umap sia, e tamaru nagirewa kwayupaya taine nagire ame ayamase tamuiwanian. Amba ek ingane epia ae wat otutamen, evenae wai den gare gare ayamat taiwanian, iwa God nop mega ok anega seane, God waen waen apan apan taine nagirewa tandardat mumeta,  
go kakaie guragut mega garaetawa,  
gine yamaet ine nagirewa muneta.

<sup>6</sup> Menan e ginae yamaet God naniwa aroewa gauarap wainiene amba wam ega om enuni wamewa tauepi me yauya ao wareta. <sup>7</sup> Ap menan vek bagu sisi ega da wandepi iragi me ase ve wanan, iwa me kwayupaya tainiwa.

<sup>8</sup> Menan wanien, nene yamam taiwanian, iwa anavi ega koewa Seitan anan manewa laion mini gururut waini waenapan gut napen men nimun nimun iwan. <sup>9</sup> Go e Seitan koewa ame ase watanan imuya Keriso anu daviana gapan tumban amun yonan, iwa, e asigiap, evenae wai Iesu anu tumasine nagire piup ma gan ikukuk wanumuine itan ame wat iriana umap sia di wat iriwanum. <sup>10</sup> Go itan doak ame one wam konintu mini nataeta, amba God yan garaet nunini apanewa, me iman wat kaimagam imae dan enueta amba me wa upaep Keriso dun mega ganatap waniai. Dun ganat ame usenagaet wande ainiwa. <sup>11</sup> Menan aro amun ameme iravi God megawa di, usenagaet wandiniwa amba verisiwa da uon. Ame umap.

### *Gaun mega uiwa*

<sup>12</sup> Ne asiginap tana gwanina apan Sailas, anu tumat Iesu inap kakaevet taini apanewa da, me ago neneni gapan ok umpatu mame dawap enan sean. Ok mame dadak enapen amba God garaet mega tave iragena wadiaena nopewa enan siangin, ame gapan am dagim yonan.

<sup>13</sup> Amba at Babilon gapan Iesu anu tumasine nagirewa, ame e umayap God om enumoniwa, amba otuna Mak den gaun kaewa muga inayap waiamun.



14 Ap menan Iesu anu tumasine nagirewa gapan gaun tapen menan gare gare ua toiwanian. Amba Iesu inayap wandini nagirewa, nonup baigan mega iragi inayap wande ep.

**Daga New Testament**  
**The New Testament in the Daga Language of Papua**  
**New Guinea**  
**Nupela Testamen long tokples Daga long Niugini**

copyright © 1974, 2004 Wycliffe Bible Translators, Inc.

Language: Daga

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023

086528d0-e040-5a5a-9a7a-41c08d0c645e